



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim i tir yimyim@ AOLIMa t tir yimyim TAPAK 3



Bola Tinubu-i Nigeria tir election kokogo

Sorkari azü menokdangtetra Nagaland nung alirtem jaokang: B Narayan



VOL. XX NO. 139 (ADOK 139) DIMAPUR UANGTEPNÜ (THURSDAY) METSÜREMI (MARCH) 02, 2023 ₹ 5.00

HSLC aser HSSLC tatidang agütsür ajak agi 40,445

Dimapur, March 1, 2023 (TYO): Nagaland nung kaketshir 24,361-i High School Leaving Certificate Examination 2023 aser kaketshir 16084-i Higher Secondary School Leaving Examination agütsüsü ta Nagaland Board of School Education (NBSE)-i Bodbarnü metetdaksü. HSLC Examination 2023 tatidang March 10, 2023 nungi March 22, 2023 aser HSSLC Examination 2023 March 9, 2023 nungi March 31, 2023 tashi agütsü. HSLC Examination nung tebur kaketshir 11,197 aser tetsür kaketshir 13164-i provisional examination centres 96 nung tatidang agütsüsü, ta NBSE-i ashi. HSSLC Examination nung

kaketshir 12,431 Arts stream, kaketshir 1214 Commerce aser 2439 Science stream lir, parnokisa ashi. HSSLC nung tebur kaketshir 7612 aser tetsür 8473 tashi provisional examination centres 65 nung tatidang agütsüsü. HSLC examination anepdang 9:00 ako nungi anüngdang 12:00 ako tashi agütsü. Külen, Class XI Promotion Examination 2023 ji HSSLC den külemi nikongdang 1:00 ako nungi nikongdang 4:00 ako tashi agütsü. Kaketshir ajaki tatidang agiba anogo examination hall/room-i Original Admit Cards bener arutsüla, ta NBSE-i nenshia metetdaksüogo.

BJP, Left-Congress, TIPRA ajaki sorkari akümtsü imlar

Agartala, March 1, 2023 (Agencies): Tripura kübok tesem 21 nung Brihostibarnep 8:00 ako nungi Assembly election indang votes azüngtsü. Taküm Tripura Assembly election nung tongtipang teloktemji Bharatiya Janata Party (BJP) aser parnok den yariteper Indigenous Peoples Front of Tripura (IPFT), Opposition Left Front aser parnok den yariteper Congress aser TIPRA Motha party lir. 2018 Assembly election nung BJP-i menden teimtiba nguteta Left Front-i küm 25 tashi sorkar yimsü süa aruba atsüngdoka liasü. Taküm election nung Chief Minister Manik Saha-i anir BJP ajanga menden 55 nung toktep aser parnok den yariteper IPFT-i menden 6 nung toktep. Külen, CPI(M)-i aniba Left Front ajanga menden 47 nung aser Congress-i menden 13 nung toktepa liasü. Left Front aser Congress külemi yaritepba ya Tripura nung tang mezüing lir. Taküm election nung

tongtipang tetokteperji Tripura chuba jabaso Pradyot Kishore Manikya Debbarma lir. Pai aniba TIPRA Motha party-i "Greater Tripaland" nung ajemdaker Tripura nung lisopurtem atema tokteper. Pradyot Kishore-i 2021k küm TIPRA Motha tentetba sülen ita ishika lir par party-i TTAADC election nung takok tulu nguteta liasü aser iba jagi taküm assembly election nung parnoki sorkar akümba nung tongti shilem agütsü akok ta asadangteta lir. Tripura nung February 17, 2023 nü polling asü aser tesem kar nung mepetmesü atalokba dak alia vote enoktsür 90% temai shilem agia liasü. Tripura elections atema exit polls ajanga BJP nem simple majority bushiteta lir aser iba ajanga BJP züngsemtemi sorkar akümtsü teimla aliba metetdaksüogo. Ajsüüaka, Left aser Congress-ibo exit polls ji kuli kecha mali ta shiogo aser parnoki ang takok angütsü ta metetdaksü. Pradyot Kishore-ia kasa olen shiogo.

Meghalaya nung candidate tongtipang kar

Shillong, March 1, 2023 (Agencies): Meghalaya nung asüngnep 8:00 nungi assembly election indang votes azüngtsü. Meghalaya nung tongtipang candidate kar aser parnok constituency: Conrad Sangma (National People's Party) - South Tura (ST) Meghalaya nung 12 buba Chief Minister Conrad ya West Garo Hills district kübok South Tura nungi MLA lir. Taküm election nung pai Congress candidate Brenziel Marak, Trinamool Congress (TMC) candidate Richard Marak, United Democratic Party (UDP) candidate John Sangma, Bharatiya Janata Party (BJP) candidate Bernard Marak aser tangar kar den toktep. Prestone Tynsong (NPP) - Pynursla (ST): Meghalaya deputy chief minister Prestone ya Eastern West Khasi Hills district kübok Pynursla nungi MLA lir. James Sangma (NPP) - Dadenggre (ST): James ya Conrad tedi tambusang lir aser pa ya West Garo Hills district kübok Dadenggre nungi MLA lir.

Mukul Sangma (Trinamool Congress) - Songsak/Tikrikilla (both ST): Taoba Meghalaya chief minister Mukul-i taküm election nung constituency ana nungi toktep. East Garo Hills district kübok Songsak aser West Garo Hills district kübok Tikrikilla nungi pai toktep. 2021 küm tatemlen Mukul-i anir Meghalaya Congress MLA aika Trinamool Congress-i anir ao. Metbah Lyngdoh (UDP) - Mairang (ST): Meghalaya assembly Speaker Metbah ya Mairang nungi MLA lir. Taküm election nung pai Congress candidate Bat Skhem Ryntathaiang aser BJP candidate Mark Sawkmie na den toktep. Iba menden nung NPP aser TMC-i candidate me yok. Vincent Pala (Congress) - Sutnga Saipung (ST): Meghalaya state unit Congress president Pala ya East Jaintia Hills district kübok Sutnga Saipung nungi MLA lir. Pai NPP candidate Santa Shylla, UDP candidate Shitlang Pale, BJP candidate Krison Langstang aser tangar den toktep.

Nagaland nung votes azüngtsü atema security akangshiogo

Kohima, March 1, 2023 (TYO): Hombarnü polling asüba Assembly Constituency 59 indang votes azüngtsü atema maparen ajak renemogo aser security akangshiogo. "Hombarnep 8:00 ako nungi votes tiptema azüngtsü atema 3-tier security renemogo" ta Chief Electoral Officer (CEO) Nagaland, V. Shashank Shekhar-i taonung osangbener dang ashi. "3-tier security nung temabaji State Police, tanabubaji State Armed Police aser telungbaji Central Armed Police Force (CAPF) ajanga ketdangtsüsü" ta pai ashi. Assembly constituency 59 kübok polling stations 2,291 indang votes azüngtsü ta CEO-isa ashi. Akuluto constituency nung BJP candidate Kazheto Kinimi den tetokteper shinga melii takok

nuogo. "District shia nung votes züngtemba sülen constituency shia nungi polling stations mashii pungugu indang VVPAT paper slips shimtsü aser ibaji EVM machines nung enokba votes den medemdangtsü" ta Shashank Shekhar-i metetdaksü. Polling asüba sülen CCTV surveillance aser 3-tier security kübok strong room nung EVMs yua lir, ta paisa ashi. Brihostibarnü candidates, returning officers aser observers lia strong room lapoktsü aser counting centre-i EVMs bener

aotsü. Iba maparen ajak ya CCTV surveillance kübok inyaktüsü. Bodbarnü polling stations pezü nung re-poll tiptema agiogo ta CEO Nagaland-isa ashi. "Zunheboto constituency aser Tizit constituency kübok Jaboka Village nung proxy voting asüba videographic kuli aliba ajanga re-poll asü. Ano, Sanis constituency kübok Pangti V aser Thonoknyu constituency kübok Pathso East Wing nung polling ketdangtsürtemi EVM machines tim mesüi amshiba ajanga re-poll asütsüsa aküm" ta Shashank Shekhar-isa metetdaksü. **Votes azüngba live re-prangtetsü** 14 buba Nagaland legislative Assembly, General Election indang votes azüngba live re-prangtsü akok. March 2, 2023 anepdang 8:00 ako nungi website <https://results.eci.gov.in/> mesüra Voter Helpline Mobile App download sür re-prangtetsü, ta Media cell, CEO office-i sangdong ka nung metetdaksü.

Noklak nung tensa mejungi aküm; nisung 1 khaset



March 1, 2023 nü Noklak Local Ground nung asür L Toyang mang yur lungkak aiterterem noksa ka angur.

Dimapur, March 1, 2023 (TYO): Noklak district nung BJP pusemertemi 7-Noklak village 'A' polling station nung re-poll asütsü takhangba agütsüdang lendong tulu ka ataloka nisung ka asü. 56-Noklak AC kübok 7-Noklak village 'A' polling station ketdangtsürtemi EVM meshibang aser polling agents indang sign mesüi dang oadok ta BJP pusemertemi ashir. Election Commission of India (ECI)-i 56-Noklak AC medeni Nagaland kübok Assembly Constituency pezü nung re-poll asütsü sangoktsüba sülen Noklak nung tensa tamajungba aküm. BJP pusemertemi Deputy Commissioner complex leni aodang sepaitemi injang khaloktsü aser idangji nisung ka khaset ta osang angazüker. Iba lendong nung tasüsang ya arishi küm 33 tain L Toyang liasü ta jangjaogo. Mongulbar ayaterm nung lendong atalok aser idangji Toyang dak tepok nung injang khaloktsü. Iba mapang ano nisung ka dak tekolak nung injang khaloktsü aser pa mozü kidangi anir ao ta iba tesem nung alirtemi ashi. Ajsüüaka, police-ibo injang agi khasetba masü ta ashir. February 27 polling anogo

nung BJP-i Returning officer dangi shidi ka zülua liasü. Noklak Village-A, Part-7 kübok Polling Officers-i EVM meshibangi dang bener ao aser Polling Agents nungi sign memeshi. Iba polling station nung nisungtem anogo piyong tarensena noktaka vote meinoktsütet ta BJP-i züluba shidi nung shia lir. Iba shidi nung ajemdaker Noklak deputy commissioner, Mhathung Tsanglao-i Bodbarnü Chief Electoral Officer (CEO) dangi shidi ka zülü. Noklak DC-isa CEO Nagaland dang tensa mejungi akümtsü akok anungji iba ken o atema mapa inyakang ta mepishia zülü. Yasüing lendong atalokba sülen BJP-isa CEO dangi iba polling station nung presiding officer-i tim mesüi inyakba shidi ka zülü. Pai vote enoktsürtem noktaksüba telongtet nung noktaksü memela aser EVM bener kanga Noklak Deputy Commissioner Office-i jena ao ta BJP-isa ashi. DC office nung presiding officer-i polling agents melii EVM shibangba aser tanga maparentem inyakang. Polling officer-i EVM nung teka iogo ta

parnokisa tai tongloktüsü. "Külen, District Election Office Noklak-ia re-poll asütsü akhangba mapang shitak nung bangdakpur ket metongtsü. February 27, 2023 aonung 10:00 ako nung Returning Officer nem shidi agütsü saka Deputy Commissioner & District Election Officer-i shidiji February 28, 2023 aonung 10:22 ako nungang yok. Pai ghonda 24 süir ang shidi yokba ajanga pai tejak re-pranga inyaksangshiba sayur" ta BJP Party Noklak-isa CEO Nagaland dang ashi. Iba ajanga sepaitemi BJP züngsem ka taküm samatsü aser aika yirutsüogo. Anungji February 27 nü iba polling station nung votes enoktsüba magir ta ECI-i sangoktsütsü mepishir, ta BJP-isa metetdaksü. "Deputy Commissioner & District Election Officer-i Election Code of Conduct alema inyaksangshiogo ta sayua onoki tasümgang maremtsü. Iba dak sendakba nung koda masüba tensa kar ajurura onoki tebilemtsü khuret kecha mabentsü" ta BJP Party Noklak-i ashi. Bodbarnep nungi Noklak Local Ground nung asür L Toyang mang yur lungkak aiter terem noksa ka angur ta osang angazüker.

Scientific beekeeping training agütsü



Punglwa Village nung February 18, 2023 nü Scientific Beekeeping with Stingless Bees and Apis cerana indang training agütsüdang tangokba noksa ka nung training ayongzüker aser shilem agirtem shisalen sayurtem den külemi tangokba noksa nung angur.

Dimapur, Metsüremi/March 01 (TYO): Nagaland nung ninang mojitzü tajungba adokdaksütsü atema Scientific Beekeeping with Stingless Bees and Apis cerana nung ananü training Peren district kübok Punglwa yimdak February 17-18, 2023 anogo agia liasü.

Iba training nung anasa aliba yimsüung trok nungi ninang metsür 64 arua aden aser parnok nem shisalen sayurtemi practical demonstration sayuba

den külemi sensaksemba mapang kaa liasü.

Scientific Stingless beekeeping, Basics on apiary establishment, Scientific hives and maintenance, Bee diseases & pests, Importance of bees and insects on pollination, Scientific honey harvesting amala onok nung shisalen sayurtemi jembia liasü.

Iba training atema sülen shilem agirtem nem stingless bee (longlang) metsütsü atema scientific box tem agüja liasü.

Iba training tenzüka session nung tesemdang tongti ama Punglwa Village indang Head GB dena liasü aser PCRC pastor-i sarasadem.

Iba sentong nung onir Dr. Otto S. Awomi, Lecturer, LBC Ayinato liasü aser Avinash Chauhan, Principal Investigator & Training Coordinator, AICRP (HB&P) ajanga iba training nükjidong indang lemsatapa liasü. Maneni Ngukho, Bee Professional, AICRP (HB&P) ajanga melepzüung o jembia.

HSLC & HSSLC Examinations 2023 atema temetetsü kar

Dimapur, Metsüremi/March 01 (TYO): Nagaland nung Higher Secondary School Leaving Certificate (HSSLC) Examination 2023 ya March 9, 2023 nü tenzüksü aser March 31, 2023 tashi alitsü aser High School Leaving Certificate (HSLC) Examination 2023 ya March 10, 2023 nü tenzüksü aser March 22, 2023 tashi alitsü, ta sangdong ka ajanga ashi.

HSSLC Examination atema candidate 16,084 (Arts-12,431, Commerce-1214 aser Science-2439) tenüung züluoka lir aser parnok ya provisional examination centers 65 nung agütsütsü.

Candidate 16,085 rongnung tebur 7,612 aser tetsür 8,473 lir. HSSLC Examination ya

anepdang 9:00 ako nungi anüngdang 12:00 ako tashi agitsü aser iba ya marks 80/70 atema aser marks 50 atema ghonda ana alitsü.

Kasa mapang Class XI Promotion Examination 2023 ya HSSLC den külemi March 9, 2023 nü tenzüksü aser March 31, 2023 nü atemtsü aser mapang nikongdang 1:00 ako nungi 4:00 ako tashi alitsü.

HSLC Examination 2023 nung kaketshir 24,360-i provisional examination centers 96 nungi agütsütsü. Candidate 24,360 rongnung tebur 11,197 aser tetsür 13,164 alitsü.

February 21, 2023 nü Nagaland Board of School Education (NBSE) ajanga Centre Superintendents ajunga den online meeting ka mena

liasü, kong parnok teinyaktsü mapatem tejangja nung jembia liasü.

Parnok dang Board ajanga agütsüba totuyubatam sülen anidaka tatidang yimya shidak amshia agitsü ashi.

HSLC & HSSLC Examinations agitsü atema temzüng-ozüingtem Board indang website www.nbsenl.edu.in nung angutsü.

Candidate temi tatidang agiba anogo ajak nung examination hall/room-i Original Admit Card bener arutsüla.

Telangzüba tem zülu metenzükdang kaketshir temi question paper kanga kumdanga azüingtsüla aser marks lemezükja aliba ama telangzüba agütsütsüla, ta sangdong ajangasa ashi.

Mao Market kitsük-kirong lendong ajurur alir nem teyari agütsü



Dimapur, Metsüremi/March 01 (TYO): Mao Market aser NN Market, Kohima nung kitsük-kirong lendong ajuru alir nem teyari sen agüja liasü, koba February 27, 2023 nü jarepa rongdoka liasü.

Tang asoshi teyari ka ama Nagaland Chief Minister, Neiphiu Rio-i sen lakh 20 agütsü aser Nagaland State Disaster Management Authority (NSDMA) ajanga lakh 30 agüja

liasü. Upper Chandmari, Porterlane aser Dzüvüru colony nung alir kibong 20 aser nisung 55 dak iba mi lendong agi kongshia liasü.

Parnok nem kibong nung züngsem apir teyari sen agüja liasü. Iba mi lendong yagi Mao Market nung dokan 92 aser NN Market nung dokan 61 nung kongshi aser parnok nema teyari senotsü agüja liasü.

Iba teyari sen ya Damaged Assessment Committee ajanga agüja liasü, kong ADC Kohima, Rhosietho Ngouri menden aser SDO (C) Sadar, Asst. Manager NSDMA (Nodal Officer for Kohima District), SDPO, South Police Station Kohima; OC, Fire & Emergency Services South Station Kohima; Chairman, T. Khel aser Chairman, Mao Market Committee nungertem züngsem lir.

Ballot azüingtsü atema Mokokchung nung training agütsü

Dimapur, Metsüremi/March 01 (TYO): Mokokchung district kübok ballot azüingtsü asoshi nunglokja aliba polling personnel nem final briefing cum training ka March 1, 2023 nü Town Hall, Mokokchung nung agüja liasü.

Ballot azüingba maparen ya Deputy Commissioner, Mokokchung indang office telungzüker nung March 2, 2023 anepdang 8:00 ako nungi tenzüksü.

Master Trainer Vinod-i ballot azüingba mapang amshitsü yimyatam aser teinyaktsü

mapatem sayua liasü.

Kasa sentong nung district nung ajaki meranga inyakba ajanga election takok ngua agitetba atema ADC Mokokchung, Chumamo Humtsoe-i pelaba lemsatapa liasü.

SDO(C) Mokokchung, Longti Sangtam ajanga Postal Ballot azüingtsü atema polling ketdangsur dang yimyatam sayu aser AEO Mokokchung, Renben Mozhui ajanga vote azüingtsü atema nungdakba tem anepalua aliba indang rasaa ashi.

Tuensang nung Oyster konger metsü lema agütsü



Dimapur, Metsüremi/March 01 (TYO): Tiakaba Longchar, District Horticulture Officer, Tuensang ajanga March 1, 2023 nü pa indang office chamber nung oyster konger metsü lema agüja liasü.

Iba metsü lema agütsüba sentong nung jembidang, iba

metsü ya district nung yangluba konger metsü mezüngbuba alitsü, ta ashi.

Pai iba teyari agirtem dang training nung angazükba ama kanga junga anepalutsü ajungshi aser ibai tang ang tendanger asünung department-i kanga junga repringtsü, ta ashi.

Kiphire nung ballot azüingtsü training agütsü

Dimapur, Metsüremi/March 01 (TYO): Deputy Commissioner, Kiphire indang Conference Hall nung ballot azüingtsü training ka March 1, 2023 nü agüja liasü.

Iba training ya Kiphire kübok assembly constituency anaprong (59 Seyochung Assembly Constituency aser 60 Pungro-Kiphire Assembly Constituency) nungi Returning Officer ana lia agia liasü.

Training mapang Master Trainer Gagan-i training agirtem dang kanga nendaka aser temolung agüja vote azüingtsü aser aibelen masütsü ajungshia liasü.

Counting tembangba sülen ajaki anaben mesüra asemben

repringshitsüla, ta pai ashi.

Election dak sendakba nung vote azüingba ya tatembang asünung ajaki pei nem nungloktsüba mapa nung rangloktsüla, ta ashi.

Tabel shia Micro Observer ka-kai yaritsü aser Election Commission of India ajanga tuyuba ama nisung ajak vote azüingba tesem anepdang 5:00 ako nung tonga arutsüla, ta Gagan-i ashi.

59 Seyochung Assembly Constituency atema vote ya DB's Court, DC Office nung azüingtsü aser 60 Pungro-Kiphire Assembly Constituency atema vote ya Deputy Commissioner, Kiphire indang Conference Hall nung azüingtsü.

IRCS Kohima branch-i Mao market semdang



Dimapur, Metsüremi/March 01 (TYO): Indian Red Cross Society (IRCS) Kohima district branch indang ketdangpur aser Managing Committee züngsem temi February 28, 2023 nü Mao Market, Kohima nung kitsük-kirong lendong atalokba tesem semdang aser iba lendong agi kongshir alirtem ajurua liasü.

Iba mapang parnoki civilian volunteers tem densema fire fighter ajak dang pelaba

lemsatap, talisa Col. Umesh Chandra Sati, Commandant 1st Assam Rifles tenüung teta pelaba lemsatapa liasü, shibai Nagaland State Fire and Emergency Services nungi mibener tem den külemi pa indang jawan temi yaritepa mi meremsep tashi yangji liasü.

Maneni IRCS ajanga kitsük-kirong lendong ajurur alirtem nem March 1, 2023 nü blanket, kitchen sets aser sanitation kits tem lema agüja liasü.



March 01, 2023 nü Ranchi nung doctor temi longkak aitiba ajanga Rajendra Institute of Medical Sciences (RIMS) nung shirangertem kinüngertemi dang anepaluba noksa nung angur.

G20 senden nung Russia-Ukraine rara atema jembitsü: India

New Delhi, Metsüremi/ March 01 (Agencies): Bodhbarnü India Foreign Secretary, Vinay Kwatra-i, G20 züngsem linüktem nungi Foreign Minister tem senden nung Russia-Ukraine tsüingda rara ya kanga tongtibang onük ka asütsü, ta metetdaksü. Osangbenertem senden nung jembidang Kwatra-i, G20 foreign minister tem senden tembangba sülen külem sangdong ka agütsütsü asü magütsütsar memetet, kechiyong Ukraine nung rara dak sendakba nung anüolen aliba linüktem aser Russia na tangatetba khenyongi balala, ta ashi. Foreign Minister tem senden nung Ukraine nung rara ajanga

chiyungtsü, energy aser fertilizer security mejungi kongshiba onüktema jembitsüa akok, ta pai metetdaksü. "Iba senden nung Ukraine nung raraba dak sendakba nung anüolen linüktem aser Russia-China tsüingda tangatetbatem atema tongtibang süa jembitsüa akok. Iba senden tembangba sülen külem sangdong ka agütsütsü atema India-i meranga inyakdar," ta pai metetdaksü. G20 foreign minister tem senden nung international organization 13 densema tejaoker 40 shi adentsü imlar, ta Kwatra-i metetdaksü. Iba senden nung US secretary of state Antony Blinken, Russia foreign minister

Sergey Lavrov, France Minister of Foreign Affairs Catherine Colonna, China foreign minister Qin Gang, Germany foreign minister Annalena Baerbock aser British foreign secretary James Cleverly nung adentsü, iba dak alia India-i jaokba ama G20 züngsem masüba linüktem-Sri Lanka aser Bangladesh nungi foreign minister tema adentsü. Tawa Bengaluru nung G20 Finance Minister tem senden amenba sülen Brihostibarnü New Delhi nung G20 Foreign Minister tem senden amentsü. G20 foreign minister tem senden nungsa tang US aser China na tsüingda anemtepba aser kiralongra dak sendakba onüktem nunga o lemteptsüa akok.

NIA Court-i kiralongrar 7 nem tasüba temerenshi obendang agütsü

New Delhi/Lucknow, March 01 (Agencies): 2017 küm kiralongraba ken o ka nung Uttar Pradesh yimtiba, Lucknow nung aliba National Investigation Agency Court (NIA Court) kati ISIS den tesendaktep aliba kiralongrar tenet nem tasüba temerenshi obendang agütsüogo, ta Bodhbarnü ketdangser kati metetdaksü. Court-i iba ken o nung February 24 nü parnok ti aija liasü saka tang ang parnok nem temerenshi obendang agütsü. Kiralongrar tenet denji inyaksemer kata taküm piyong tepuokdak ayutsü obendang agütsüogo, ta paisa metetdaksü.

court kati ISIS telok tenüing nung linük nung kiralongratsü atema nisung shimba maparen inyakba atema adianu ana küm 10 tepuokdak ayutsü obendang agütsü. Ken o balala ana nung court-i obendang agütsüba densemabo kiralongra dak sendakba ken o shilem 93.69 nung NIA-i obendang agütsü. Uttar Pradesh nung kiralongra ken o nung aija tasüba temerenshi obendang angur nisung tenetji Mohammad Faisal, Gauss Mohammad Khan, Mohammad Azhar, Atif Muzaffar, Mohammad Danish, Sayed Meer Hussain aser Asif Iqbal (Rocky) nung lir. Parnok den külemi inyaksemer, Mohammad atif (Atif Iraqi)-a taküm piyong tepuokdak ayutsü obendang agütsü, ta NIA otongdar kati metetdaksü. Ano Gujarat nunga NIA (Maneni tapak 8 nung...)

Küm asem tsüingda Odisha state nung shiti 245 tashi süogo

New Delhi, March 01 (Agencies): Tesüiba küm asem tsüingda Odisha state nung shiti 245 tashi asüba osang jangjaogo, ta Bodhbarnü ketdangsertemi metetdaksü. Shiti 245 ji 2019 nungi 2022 küm tashi nung asüba lir, ta parnoki metetdaksü. Mongolbarnü state Assembly nung jembidang Odisha state Forest & Environment minister, P K Amat-i, shiti 245 asüba nungjagi trokbo shikaritemi ozüing alema kasetba lir; shiti kasetba, shiti tepo aser keyi teküp shibelenba dak sendakba nung nisung 47 puogo, ta metetdaksü.

Tai tonglokja alirtem ket nungi shiti tepo 39, keyi teküp ka aser keyi temezüing 9 puogo, ta Forest Minister-isa metetdaksü. Tesüiba küm asem tsüingda state nung shiti ka danga mekhaset, ta pai ashi. Ozüing alema keyi shikariba nokdangtsü atema state sorkari anti-poaching camps amenokba den külemi special squads tenteta lir, ta minister-i metetdaksü. State kübok Balasore district nungi report ka ajanga ashiba agi, taküm küm kija nung Kuldiha Wildlife Sanctuary nung shiti trok süogo

aser iba nungji Mongolbarnü shiti tetsü ka shiranga asüba densema lir. DFO, Balasore, Sumit Kar-i, tesüiba küm ana tsüingda iba sanctuary nung ozüing alema shikaritemi shiti ka danga mekhaset, ta metetdaksü. Tesüiba küm asem tsüingda state nung ozüing alema shiti kasetertemji Angul, Balasore, Mayurbhanj, Boudh, Cuttack, Deogarh, Kalahandi, Keonjhar aser Subarnapur district tem nung apu. Shiti tepo teimba apubaji (16) Keonjhar district nung liasü aser Mayurbhanj district nunga shiti tepo 12 apu, ta ketdangertemi metetdaksü.



March 01, 2023 nü New Delhi nung Press Information Bureau (PIB) nung Principal Director General tasenba, Rajesh Malhotra-i office mapa agizütsü atema arudang tangokba noksa nung angur.

Sorkari azü menokdangtetra Nagalandnungalirtemjaokang:BNarayan

Ranchi, March 01 (Agencies): Jharkhand assembly nung budget senden agidang BJP MLA, Biranchi Narayan-i kibur maliba azüi nisung aika yirutsüba tebilemtsü süoka liasü. "Sorkari iba tebilemtsü onük atema kecha meinyaktetra Nagaland nung alirtemjaokang, ibaji ajanga iba tebilemtsü samatsü," ta Bokaro nungi BJP MLA-i ashi. Paisa, state yimtiba Ranchi kija nunga anogo shia nisung 300 shi yirua dog bite centre-i anir arur, ta metetdaksü. Pai dang masü saka MLA aikatia, azü nem vaccine magütsüba aser sterilize mesütsüba ajanga iba ya nüburtem atema amokmeren tuluka kümogo, ta ashi. Azüi amakdang yirutsüba ajanga asür kibongtem nem senotsü teyari agütsütsü atema ozüing ka alitsüla, ta MLA temi ashi.

Biranchi-isa, azü aser shiruru meimertemi license makai kibur maliba azü 'adopt' asür, ta ashi. Bokaro nung azü aputsü, treatment agütsütsü aser sterilize sütsütsü atema inyakyim kecha mali, anungji Ranchi densema yimti tulu ajak nung inyakyim ka benoktsüla, ta pai ashi. Dhanbad nungi Jharkhand Mukti Morcha (JMM) MLA, Mathura Mahto-i, district ka nung nemzüa aliba azütem puaka azüji ano tanga district ka nung chiokba ajanga iba tebilemtsü adoker; Bokaro nung apuba azütemji Dhanbad nung chioker, ta metetdaksü. MLA temi iba tebilemtsü onük lemsatepba sülen in-charge minister, Satyanand Bhogta-i, sorkari tekarakba nung iba tebilemtsü onük atema inyaksü aser kibur maliba azü ajak pua vaccine agütsüba den sterilize sütsütsü, ta metetdaksü.



New Delhi, March 01, 2023: China Foreign Minister, Qin Gang-i India semdangtsü aliba anema Bodhbarnü New Delhi nung aliba China Embassy kima Tibetan Youth Congress-i longkak aيتدang police-i longkak aiter ka puer aoba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 02, 2022

Kechiba MLA shimer ?

Tanü putu nung MLA (Member of Legislative Assembly) shimtsü asoshi election agidang asenok rongnung yamai tashiyim amshitepa shimba ya kechisütsüba shimer ta asenoki khenbo bilemdanger asü ? Election ya akhi mapang konang nüngsang atema lepteptsüngtepa raraba tongpang amato ka masü. Mesüra alima kin kati ka makdoktsü asoshi ayongzükba rara tongpanga masü. Election agiba nung ya pei kisüng agitsü asoshi toktepba aser raktepba kecha mali saka ibai nübortemi nübortem asoshi yimsüsür aser ketdangser shimba sentongang ka lir, anungji election ya raratepba mapang masü saka pelatepa pei mulungba lenir shimba mapang ka asütsü tim. Atangji, pei pei telok balala lemdanger takok tokteper asünungji, meimchir yimya nung takok ngunüdüng tim masüba mapatema inyaker alir. Ajisüaka, küm pungo atema MLA ka shimba election nungbo nisung taküm aotsüsa aser yirutsüsa azü tokshia raratepba aser kiojen raksatsüba mapatemo matalokdaktsütsüla. Iba amai MLA ka küm pungo atema shimba election nung yiar ama kümer, nisungi nisung taküm mapayu inyaktepdi asünungbo, küm pungo atema masü saka akhi mapang ama alima mesama tashi teti chuba menden agi senmang kuma yimsü asütsü atema MLA masü chuba-ang ka shimtsüla. Aji oda, kodang asenoki alima mesama tashi chuba menden agi senmang kuma yimsüsüyonga aotsü atema nisung ka shimdir, joko election khen agirbo tanaben agitsüba tebilemstü malitsü aser teti chuba kin aser chuba kidong asütsü shimer asünungji azütokshia raratepyonga raratep langa asütsü. Ajisüaka, tanü election agiba yabo asenoki tenzüktsü atema chuba shimer masü saka küm pungo asenok tenzükdaktsütsüba atema ketdangser aser ozüng yanglur ka shimer. Atangji, asenoki asenoksasa MLA shimba ya chuba shimer amai bilemer aser MLA akümertermia aikati chuba aküm amai bilemer. Ashiko, ibaji jagi sen, yi aser tanübo drugs dena amshia raratepa shimer asütsüa akok. Aji oda, chuba yimli ka akümstü atema tongpang nung nokdaker nokinketer ama bilema election nung injang bomb aser süng long amshia pei taküm samaa mapayui tashiyim mapa inyaker asütsüa akok. Ajisüaka, election nung tashiyim mapatem agi tangar tsübudakja inyaktertemji nokinketer masü saka pei temeten aser pei mang yoka chir tasüa majem pi ka asoshi nokdakertem lir. Parnokji tasütait nokinketer masü saka sen agi 'hire' asüba purtem lir. Itemji mangkoterongi matutsü aser item nemji takok ken mejemtsür malitsü. MLA ka akümstübaji kanga tongtibang aser tenügdaktsü, kechiyong state nung MLA ka shimbaji nübener kidang kinungertem rongnung kidang nungdakbatem reprangtsü nisung ka shimer amai lir. MLA jagi tatar senden nung pei constituency nübortem ajak tenüng nung shilem agitsü. Tetezü, tatar senden nung MLA jagi pei nübortem nungdak süoka jembitsü aser nübortem asoshi nungdakba temzüng ozüng latettsü. Aji oda, MLA ji yimsüsür asünungji parnokji tatar senden nung küm shia pei lima aser nübortem asoshi nungdak inyaka aotsü atema senotsü sentong renemtsü aser tatar senden malidang pei constituency nung pei nübortem nungdak reprangja anepalutsü. Aji oda, state government kübok department shia nungi pei nübortem kechi tangutsü tim, itemji asüngdangtepa talilaa bushisema bener arua terenlok mapatem inyaksütsü. Atangji, tejangrar aser tangateter atemabo MLA inyaka nübortem tenzüktsüba ya jangratemtsüka, kechiyong parnok ket nung nübortem asoshi nungdak inyaksütsü asoshi hadir lir, hadirji political power. Aji oda, election nung toktepba ya nisung o nisung na arishitepba mesüra tsükchitepba mapa ka masü saka nübortem lu inyaksütsü asoshi hadir raktepa asayaba asaya ka dang lir. Ibaji kodang angatetdir, shingaia MLA menden sen agi alitsü memerangtsü aser shingaia shinga sen chitsür tangar meyrutsütsü. Aji oda, asenoki MLA shimba ya chuba shimer ama mebilemi asenok küm pongo tenzükdaktsütsü ketdangser ka shimer ama bilema election nung shilem agira, atangji candidate dang sen meshitsü melen asenoki candidate nem tenla agütsütsü. Ibaji Clean Election aser Clean Politics asütsü, aser iba jagiang Nagaland inyakyim ajak "Clean" sütettsü.

OLEMSABANG

KIMUNG TILA NUNG TENLAKI TULU

~ Rev. Dr. Nuklu Longkumer, Dimapur

Khristanpur aliba ajak nung pei yari tenlaki yanglur. Tamanger tera alidang mezüngbo asen akaba süngküm, tongnü, azü, süra aser yong amshia ki yanglu. Netsüng renloka aodang iba yari yanglushia aser tejenji bendoker tasen yanglua ao. 2022 tashi nung joko Naga lima nung Osang Tajung arur küm 150 jungogo. Arogo shia pei tashi yari tenlaki yanglur asünung asen Ao lima nung Tenlaki tajung küm aika kulemtettsusa, oda kum 100 tashia külema otettsüsa yanglua lir.

Tenem lima nung yangluba tenlaki aika jaga tesadem mengutetba agi tenlaki kimong dak alaka arogo nung nungdakba ki-o-jen yanglutsüsa jaga maliba tenlaki aika lir. Town tesem nungbo joko item ajak apidanga tenla ki den kechisa nungdaker item kimongtem aliloka aor. Tenla ki den sendaktepa aliba ki-o-jen itemi lir: Sunday Skol rooms, Children Hall, Ghari anendak, Arogo benjung balala nung amshitsü tesem, Arogo Ministry ajak atema Office, Conference Hall aser Guest House etc.

Asüng arogo teimlaji Sunday Skolji lir. Item lanurtem atema arogo teinyaktsü tulu lir. Sunday skol nung lanurtemi Tsüngrem o den Ao oshi angazüktsü. Tsürapur sentepi arudang külemi tanurtema arua Tsüngrem külemstü asoshi Children Hall ka alitsüla. Ghari anena ayudak jagaji onsara tongtipang kümogo. Ano arogo nung benjung aika ajurur. Talisa Temeshi kiyimba, Christmas aser New Year lokti chiyongba, arogo sentong balala akadang lokti atenshia chiyonga ajemdak, item ajak akatsü nungdaker. Asen tenlaki nung item facilities maliba ajanga kiyimba kulizüngbo arogo tenlakidang agir aser chiyongkiyongbo tanga jaga tesadem nung oa agir. Kodang satiba benjung tanga tesem nung renemdir kulizüng agitsü tenlakidang arur tera dang aser Resort/ Wedding Reception tesem jagi aor dang teimba akümer.

Temalen shia aliba facilities ajakji kudasür ngutettsüü Tenlaki yagi jaga tulutiba agir aser kimung aliloka aotsü tenlaki anasa aiben ali menguteter sakatenlaki anasaji facilities ajakji alitsüla. Anungji shisa akar arogoibo kimong tila ka nungji arogo nungdakba facilities ajakji agiteta yanglua amshiteta aoba angur.

SHIRURU/MOJING NUMBER 666 (J.ADOK 13:18)

~ Rev. S. Temjen Longkumer, Chumukedima.

A.D. mezüng putu nung anülulen lima aser Asia Minorji Rome yimli kübok liasü. Tongtibangsa iba putu tatemlen Rome Chuba 7 buba, shiba tenung agi Domitian liasü (AD 81-96). Pa ji Khristan rishikangshir tetsüdi tanabuba liasü. Mezüngbubaji Nero chuba liasü (AD 55-68). Domitian chuba mapang rishikangshi tulu liaka Khristan tem tamang nung tasütait ajanga nütsung renloka aoba ngua iba chubaji tipmatem. Khristan tem tekülem ola "Yisu ji tang Kibur aser Tsüngrem" ta ayimtenba olaji azüoktsü asoshi Rome yimli ajunga nung Chuba külemba (Emperor's worship) sentong tenzük. Aser shirisa chuba külemdir pa/la ne kuli kaket (Certificate) agütsü. Iba kuli kaket akartemi tang lokti shishidak (public market) oset aser chiyungtsü alitsü akok. Iba kuli kaket makartenji lokti shishidak kecha alitsü mesura ayoktsü memela. Iba ozüng ya Rome chuba 7 buba Domitiani tesashitiba inyak. Iba sentong yagi Rome yimli kübok aliba linük aser yimtem ajak dak kongshi.

Iba mapang Yisu nütsüng Yohan, shibai Jungkai Adok kaket zülü, "pa Efesa yimti nung liasü. Efesa ya Rome nungi talangka pilar Asia Minor, tang Turkey ta ajaba idaki lir. Domitian chuba ozüng agi Yohan-a Patmos Asetkong tepuokdaki yok. Patmos ya Rome yimli mapang nisung tamajunger ayudak liasü. Yohan idaki kanga timtema ita 18 ali aser iba mapang Yisu Khrista nungi pa dangi Mangdang (Vision) aruba ajak zülü ta ashir. Tang Jungkai Adok 13:18 nung No.666 zülua aliba asenoki angur. Ibai teratatsü number lir, nisung kari teratetba tera balaka agütsütsü akok. Saka asenok atema tangatettsü temelatiba aser chichiba ji ya asütsü (literally & historically).

Yohan ya Yihuda nunger liasü. Yihuda nungeri No.6 ji mojing number (evil number) aser No.7 ji temeshi number (divine number) ta züngshia liasü. Anungji No. 666 tetezüji tamajung 3 ben meyoktepba, (triple evil) koba ajak dang tamajungtiba. Anungji kodang Yohani ibai zülü pa nükla nung shiruru/ mojing chuba Domitian liasü ta ashir, shibai paji "kibur aser Tsüngrem" ta ashir. Yohani pa dang mojing chuba ta aja aser pa tenüng melena Shiruru/ Mojing number 666 ya agütsü. Aser aji shingaia rateta mashitsüla ta tekümdangtsü ashi, kechiaser iba nungi lendong lir (13:18).

Iba putu nungi tenzuka yimten yimsüsür shir meimchir shisatsü samar shiruru/mojing shisatsü tener taochi makai pei nübur madak yimsü asür parnoka iba number atishia jembir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kasa o kasa kibong akümba ya Laishiba tesayuba anema lir: Anglicans



February 07, 2023 nü London nung aliba Church House nung Church of England General Synod nung kasa tetsür o tetsür na mesüra tebur o tebur na kibong kümer alirtem Arogoi moatsütsü atema vote agütsütepang Archbishop of Canterbury, Justin Welby-ia ibaji pusema teka ajichilen mekangba mapang tangokba noksa nung angur.

March 01, 2023: Global South (Africa, North America, South America aser Asia-Pacific) nung Anglican lenirtemi, Church of England-i kasa tetsür o tetsür na mesüra tebur o tebur na kibong kümer alirtem Arogoi moatsütsü atema putirtem nem temelaba agütsütsütsü atema telemtetba agiba aitsüogo.

Canterbury nung Archbishop Justin Welby leniba nung Church of England General Synod nung iba telemtetba agiba atema parnoki Welby aitsür.

Church of England-i tetsür o tetsür na mesüra tebur o tebur na kiyimba ketdangsüa magütsütsü, ajisüaka parnok ama kibong kümer alirtem moatsütsü akok. General Synod-i iba telemtetba agiba sülen Anglican Arogo nunga telemsa adokdar.

Interview ka nung osangbener den jembidang Rwanda nung Archbishop Laurent Mbanda-i, "Church of England-i inyakba ya tasü mang süngden nung kojat tatembangbuba angenoktsüba lir. Anungji onoki Canterbury aser Canterbury nung archbishop tashiji joko magizüker," ta metetdaksü.

"Iba ya Laishiba tesayuba ama masü. Joko Archbishop of Canterbury dak lenitsü atema tashi mali," ta paisa metetdaksü.

"Pai (Archbishop Welby) pa menden nungi manentsü ta ashir, ajisüaka pai tenanzükba agiba ama meinyakba mapang nungi pa iba menden nungi anenogo," ta Mbanda-i ashi.

Taruba ita, April nung par province nung 4buba Global Anglican Future Conference (GAFCON) ayongzüka akatsü aser iba mapang nungji iba onük nung o lemteptsüa akok.

GAFCON kübok Anglican Khristan züngsem million 85 shi lir. Mbanda-i, "Nü ket nung sen

jenti alitsüa akok, saka nai kodang Laishiba nungi piladir na tejenokdak kecha malitsü," ta metetdaksü.

Congolese Anglican Bishop, Steven Ayule Milenge-ia, Church of England-i agiba telemtetbaji satani Arogo telung nung mapa inyakba lir, aser ibaji lenirtem kar ajanga inyak, ta ashi.

Osangbener den jembidang Milenge-i, "Lenirtem aikati Arogo ya secular telok ka ama ketdangsür. Asenoki Laishiba nung shia aliba sülen anidaktsüla aser Laishiba nung ajemdaker tesayuba agütsütsüla," ta ashi.

February 20 nüa Global South Fellowship of Anglican Churches-i Church of England-i kiyimba tsütsü akhidang nungi aliba tangatetba nungi pilaba atema aitsü.

Global South- Africa, North America, South America aser Asia-Pacific nungi tongti putirtemi sangdong ka ajanga, Church of England-i akhidang nungi aliba tamang nungi pilaogo aser tesayuba tai lenmang shimogo, ta metetdaksü.

February 9, 2023 nü Church of England General Synod-i, tetsür o tetsür na mesüra tebur o tebur na kibong akümba sülen parnok tenüngsang agütsütsü aser Tsüngrem dang temoatsü meshitsü atema Tenla kidangi arutsü melatsü asoshi telemtetba agia liasü.

February 6 nungi February 9 tashi General Synod nung iba onük nung o lemteptsü sülen Canterbury nung tongti putir, Justin Welby aser York nung tongti putir, Stephen Cottrell nati, "Tang mezüng Church of England-i yimjak nung kasa o kasa kibong akümertem Tenla kidang pelaa agizüktsü atema Synod-i telemtetba agiogo," ta metetdakja liasü.

Church of England-i tetsür o tetsür na mesüra tebur o tebur

na kibong akümba memelatsü saka parnok ama nem temoatsü meshia sarasademtsütsü akok, aser iba ya Marriage (Same Sex Couples) Act 2013 kübok tim lir, ta metetdakja liasü.

Church of England-i Laishiba tetuyuba nung tetsür ka aser tebur ka na tsüngda kiyimba tangatetba nung maneni nokdaksü, ajisüaka kasa tetsür o tetsür/tebur o tebur (gay) kibong kümer alirtem moatsütsü temepishiba agütsüba sülen Synod nung ibaji agizükogo.

South Asia nung Tasen Lai meyipzükba atema Khristantem pelateper

March 01, 2023: International organization kati kanga lendong aketba region ka nung lisopur teyari agia parnok oshi nungji Tasen Lai meyipzükba renemba ajanga reshikangshi tia nung aliba Khristantem pelateper, ta osang ka ajanga metetdaksü.

Wycliffe Associates teloki Middle East, Asia aser Africa nung Khristantem reshikangshiba tesemtem nung oshi balala nung Laishiba meyipzüktsüba ajanga Khrista osangtajung proker. Laishiba meyiptsü atema training agütsürtemi tesem balala nung aliba lisopurtem den English, French mesüra Spanish oshi ajanga tongtepratepa inyaker.

Parnokisa oshi balala nung Laishiba meyipzüktsü atema computer aser translation software agütsüba densema technology teyari balala agütsür.

Tawa Wycliffe Associates-i South Asia kübok Muslim nunger nütsüng teimba aliba linük ka nung Tasen Lai meyipzükba maparen renemogo. Hopta ana tejaklen Tasen Lai semzükba sentong nungji Wycliffe Associates-ia shilem agia liasü.

Iba linük official oshi nungbo Laishiba adoka lir, ajisüaka kanga tezülen aliba tesemtem nung jembiba oshi nungji

ANOGO ABEN TSÜNGREM DEN

Khuret Aser Temoatsütem

- T.Ken 68:19-27

"Kibuba shibai anogo shia asen khu abener, Pa temoatsüba" (t.19). Iba tekong ya asenoki yamaia meyiptsü akok, "Kibuba, shibai anogo shia asen khuret abener pa temoatsüba." Asenoki khurettem aser temoatsütem shisadangdi. Tsüngremi asenok nem taküm nung khurettem agütsür. Kenken asenok sasa taküm nung khuret bena arur, anema abusoba, temenen menaba, mamangba, temeim makaba aser tajung mesayutetba ajanga. Saka Tsüngremi shimba lemang nung Pai mulungba ama jajara, aser asenok dangi khurettem arura, Pai asenok nem item khurettemji agütsür. Asenoki taküm nung khurettemji temoatsütem ama angatetdi.

Tatishitsü tulutibaji Tenyar Paul asütsü südi. Pa shi nung ayi agi koda timtemdaksü! Pai asem ben ibaji agientsü sarasadem. Agientsü melen Tsüngremi ibaji temoatsüang kümdaksü. Pai Paul dang ashi, "Ni na nüngdakba tauchi agütsütsü" (2Kor. 12:7-9). Kenken Tsüngremi mapa agienba ajanga sarasadem langzür. Kenken mapa tali bendenloktsüba ajanga sarasadem langzür. Yamaji Pai Paul dang inyak, aser khuretji temoatsü ka aküm.

"Saka," nai ashir, "Ni khuret tulu lir. Ni iba nung kecha temoatsü mangur." Anogo shia tekong 9 ji bilemtetang: "Kibuba shibai anogo shia asen khu abener, pa temoatsüba." Asenoki mapang ka nung anogo ka dang alir. Ne taküm nung kechisa ajangshia aru bilemtetang. Nai kodanga ajanga moutettsü ta bilemba mapangtema ajanga aruogo. Saka iba ajanga Tsüngremi anir aru. "Anogo shia tanü onok nem chiyongtsü kua" (Matt. 6:11). "Aser, Kibuba, anogo shia onok khuret aser temoatsü agüjang."

Asenoki koda ka bentettsü Tsüngremi meteta lir. Saka ne khurettemji tanga lemang ka lir. Tsüngremi itemji temoatsü agi melentsütsü akok. Pai ne nem khuret agüja lir asü? Ibaji Pai temoatsü balaka agi melentsütsü akok.

Laishiba adoka maliasü.

Wycliffe Associates nung field training director, Tony Tophoney-i, South Asia nung Laishiba meyipba project renemtsü atema küm asem shi agia liasü, ta metetdaksü.

Iba project nungji dollar sen 55,000 shi indok aser organization indang translation projects nung dollar sen 100,000 tashi indoker. Iba nungji training agütsüba, laptops den software agütsüba, nübo aser Laishiba meyipba dak sendakba maparen balala nung sen indokba densema lir.

Wycliffe Associates-i tenla agütsünertem bushir aser senden ayongzüka parnoki inyakba mission osang lemsatepa pei melungba tenlatsü ajungshir.

Küm asem shi iba project inyakba mapang nung mapang ka nungbo police-i iba project inyakerem dang asüngdangyaa liasü. Iba project semzükba sentong nunga nisung noklang aika adenshi saka police-i ibaji ashishia liasü.

"Iba linük nungji Muslim nütsüng teimba lir saka lisopur aser South Asia nung aliba lisopurtemi pei maittsü wazüka ayutsü meranger," ta Tophoney-i metetdaksü.

Khristantem reshikangshiba

linüktem nung Laishiba meyipzükba projects inyakttsü atema trainers-i tamasa lisopur lenirtem ajurur, ta pai ashi.

Oshi balala nung Laishiba meyipzüktsüba International organization- Wycliffe Associates-i 2020 küm nung Laishiba oshi teimtiba nung meyipzükba liasü.

Wycliffe Associates-i oshi ajak nung Laishiba meyipzüktsü nükjidong nung 1967 küm nungi tenzüka Laishiba meyiper. 2020 küm nunga parnok oshi 8 nung Tejen Lai meyipzükma aser Tasen Lai bo oshi 141 nung meyipzükogo.

2020 küm Wycliffe Associates-isa nüpkokertem aser narong-jakertem atema-a Tasen Lai meyipzükmaa liasü; ibaji ajanga nüpkoker aser narong-jaker million 56-i Lai O metettsü.

Oshi meyipzükba ya notation lir, koba dang SUN (Symbolic Universal Notation) ta ajar, kechiyong ibaji ajanga Laishiba nung aliba olongtem temaitsü sayur.

Wycliffe Associates-i ashiba agi, SUN ya shisaliok agütsütsü atema lir, kechiyong alima nung nisung million 70 shi tenarong jaker aser iba nungjagi shilem 80-ibo 'sign language' ajanga mejembiteter.

AO OSHI ANGAZÜKDAK:

TANÜ ANGAZÜKTSÜBA OJANG



Pakpaker

(adj) kecha tanang, taku aser tasen mali (tasteless)
* Shirangba mapangbo chiyongtsü ajak **pakpaker** chiteter.

Paksa

(v) ayasa, aika kuma pakma (split into many)
* Au taro ajak **paksar** mi apuset.

OLONG PAITEP # 6444

Grid for crossword puzzle with numbers 1-19.

TIPIEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaktsü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6443 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kioaktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.



TASÜNGDANGBA ASER TELANGZÜBA :

- Alokba** : Narola tetsü, Ni tasüngdangba Kar asüngdangdi nai langzüangno!!
"Ni yangi lir Ni yokang" ta asüba ya shibai Shiba dang ashiba o?
- Kinungtsü** : Tokorashi, Balli tempu dang ashiba südija!
- Alokba** : Chi-i tetsübutibaji Shiba?
- Kinungtsü** : Chi jagi Shi kanga tsübur, anungjiang tepang nung memongi yiatoker.
- Alokba** : "Ni aidi ni" ta asüba ya shibai shiba dang asüngdangba o ?
- Kinungtsü** : Candidatebai yimtsüngtem dang asüngdangba Adi!
- Alokba** : "Süngjem süngjema liang" ta asüba o ya koba mapang jembir?
- Kinungtsü** : Election atemba aonung nungi jembir.
- Alokba** : Tantsü ! Sürapangla na-a taonung nungi kidang süngjem süngjema mejangangno!

Lilir : Mail

Conrad Sangma-i Guwahati nung Himanta Sarma den ajurutep



Meghalaya Chief Minister Conrad K Sangma-i Bodbarnü Guwahati nung Assam CM Himanta Biswa Sarma den ajurutepa noksa nung angur.

Shillong, March 1, 2023
(Agencies): Meghalaya Chief Minister Conrad K Sangma-i Bodbarnü Guwahati nung Assam CM Himanta Biswa Sarma den ajurutepa senden ka menogo.
BJP-i aniba North East Development Alliance (NEDA) nung convenor ji Sarma lir aser Guwahati nung pai Conrad den ajurutep.

"Conrad yasüng Guwahati-i aru aser Sarma-i pa den hotel nung ajurutep" ta osang ka ajanga ashi.

G20 summit nung Business delegates 48 aser foreign diplomats 17 adener

Aizawl, March 1, 2023
(Agencies): Aizawl nung G20 senden nung linük 17 nungi business delegates 48 aser diplomats 17 adener ta chief minister Zoramthanga-i metetdaksü.

Mizoram nung March 1 nungi 3 tashi Business 20 (B20) conference alir aser iba ya G20 senden nung shilem ka lir.

G20 summit nung Union Minister of State for Commerce and Industries Som Parkash aser Minister of State

Meghalaya nung political party kechaia sorkar akümtsüsa menden mangutsü ta exit polls ajanga bushiteta aliba mapang ka lir.

Meghalaya elections nung Conrad-i aniba NPP-i menden teimba nung takok angutsü ta exit polls ajanga ashir.

Meghalaya nung NPP-i aniba Meghalaya Democratic Alliance (MDA) nung tesüiba küm pungu tashi BJP aser NPP yaritepa sorkar yimsü süa aru saka taküm election nung telok ana tesentaktep kecha melii

dang toktepa liasü.
Mongulbar nikongdang Assam Sarma-ibo Tripura, Nagaland mesüra Meghalaya nung hung assembly masütsü aser BJP aser onok den yaritepertemi state asemprong nung sorkar akümtsü ta metetdakja liasü.
"NEDA telok kechaia Congress mesüra TMC den tesentaktep mayutsü. BJP-i menden anguba repranger ang taruba Meghalaya chief minister atema telemtetba agitsü" ta CM Sarma-isa ashi.

for External Affairs Dr R K Ranjan Singh na adentsü.
"B20 senden ajanga G20 nung tongtipang nisung aika longjemtsü aser policy yangluba nung yariteptsü" ta Zoramthanga-isa metetdaksü.

Bendangertem toktsür India nungi teshimtet nübo 16 aser local startups 85 tashi shilem agitsü.

Aizawl tezülen aliba Mizoram University (MZU) nung asüng tongtipangba sentong agitsü, ta chief minister-isa ashi.

Iba mungdang nung Confederation of Indian Industry (CII) ajanga Business to Business (B2B) aser Business to Government (B2G) sendentem acha-ayanga agitsü.

Iba senden nung adenertemisa Mizoram nung benjung tulutiba aser tongtipangba Chapchar Kut nung shilem agitsü. Iba benjung ya Hokolbarnü Lammual (Assam Rifles ground) nung amongtsü, ta chief minister Zoramthanga-isa metetdaksü.

Meghalaya nung party kechaia menden 16 tema mangutsü: Al Hek

Shillong, March 1, 2023
(Agencies): Meghalaya nung party kechaia menden 15 tema mangutsü ta Meghalaya BJP lennir aser MLA Alexander Laloo Hek-i ashi.

Hek ya Pynthorumkhrah constituency nungi MLA lir aser pai ashiba agi Meghalaya hung assembly asütsü.

"Exit polls aika lir aser ni ka dak danga temulung malemer" ta AL Hek-i ashi.

"Meghalaya state elections nung party kechaia menden 16 tema mangutsü saka iba yak ü tangatetba dang lir" ta paisa shisem.

February 28 nü Guwahati nung Chief Minister Conrad Sangma aser NEDA convener Himanta Biswa Sarma na ajurutepba atema asüngdangdang "sorkar akümtsü atema political party mesüra lennir mashi ka den



Alexander Laloo Hek

ajurutepba nung tai mali saka BJP-i koba party den sorkar akümtsü lemtettsü" ta Hek-i metetdaksü.

BJP-i kasa tangatetba aliba aser ochimashi maliba party tem den külemi sorkar akümtsü, ta paisa ashi.

BJP-i TMC aser Congress den yaritepa sorkar akümtsü mulunga lir asü ta osangbeneri

asüngdangdang "BJP indang kishi teti lapoka lir aser Meghalaya jenjang tajungba nung ajungkettsü aser tejakleni aotsü atema onoki party mashi ka den yariteptsü" ta Hek-i langzü.

Külen, Chief Electoral Officer (CEO) FR Kharkongor-i March 1 nü Ri Bhoi district election officer dang Mawhati constituency kübok polling station ka nung tim mesüi inyakba bushisüngdangtsü tetuyuba agütsüogo.

Iba polling station nung voter kati ballot unit nung candidate ka nem vote enokja ballot button nung anemba indang noksa ka social media nung prokshiba sülen CEO-i iba tetuyuba agütsü.

Iba ya ozüng alema lir aser vote enoktsürtem polling stations telungi mobile phones bener meyoktsü tetuyuba agüjaka iba ya inyak.

Greece nung train ana tsüktep, nisung 36 shi asü



Larissa, Metsüremi/March 01 (Agencies): Greece nung train ana tsüktepba sülen iba lendong nung nisung 36 asü aser aika yiru, ta ketdangsurtemi ashi.

Iba lendong ya Larissa yimti tezülen Mongulbar aonung atalok, kong passenger train ka linük yimtiba, Athens nungi Thessaloniki leni aodang yimti north tsütsü nungi khu bener aruba train ka den tsüktepa liasü.

Tsüktepba mapang passenger train takdang kar nung mi adoka apok.

Passenger train nungya nisung 350 shi mena liasü, koba Athens nungi nikongdang 7:22 ako (par mapang) nung ayamesoa liasü, ta rail operator Hellenic Train ajanga ashi.

Iba lendong nung nisung 66 yiru aser item rongnung nisung trok intensive care nung lir aser ano passenger 250 shi tera yirur bus ajanga mile 80 shi pilar

aliba Thessaloniki bushia anir ao.

Temang rongsar alirtem anepaluba hospital unit tem nemo sang agütsü aser ambulance ter dak tema yoka liasü.

Ato Kilonser Kyriakos Mitsotakis indang office ajanga asemnü linük nung mangyimtsü sangdong aser pa lendong atalokba tesemi aor ta ashi.

Kasa mapang Greek Tir Katerina Sakellariopoulou-ia la Moldova semdangba anogo ajemer aser linüki meyiba arutsü, ta ashi.

"Kü nürtem anasa alitsü, teyari nungdaka alirtem yaritsü asoshi ni bendang lima semdangba mapang ajemtsüsa akumer," ta lai Moldova yimtiba Chisinau nung osangbener senden ka nung Moldova Tir Maia Sandu anasa ashi.

Train ana ya lenmang kasa nung arua liasü, ta Thessaly regional governor Konstantinos

Agorastos-i ashi. "Train ana ya kanga kera jaja liasü aser driver kati ano train ka aruba memeteti liasü," ta pai ashi.

Passenger train indang tejaklen aliba carriage pezü lenmang tezüleni ao aser ano mezüngbuba ana nung mi adoka okshia amai sama, ta Agorastos-i ashi.

Television footage nunga lenmang tezülen carriage tem prokshia aliba aser khu bena aliba container makepa aliba nguogo. Tekumzüker temi torch amshia passenger tem bushia liasü.

"Onok lendong tuluka nung lir. Onoki nisung takum, yirur aser asürtem atsüteter. Onoki nisung ajak mangu tashi yangi alitsü," ta volunteer kati ashi.

Iba lendong atalokba sülen ajungben sorkar senden ka ayongzüker aser Greek health minister Thanos Plevris lendong atalokba tesemi ao.

SÜR KÜM KA AJUNGBA BILEMTETER

Asür Imkonglemla Longkumer (1921 - March 2, 2022)

"Na bilemtetba shia ni kü Tsüngrem tenüing asanger." - Filipi 1:3

Nai onok toktsür küm ka jungogo. Onoki anogoshi na aser nü takum bilemteter. Temang shi nung nai onok toktsü saka nü tanüla, temeim aser yimyatem onok den alir. Nur chir, semchir aser poner asütsüsa onok nem na moatsüba asoshi Tsüngrem dang pelar.

Temeim chimur, semchirtem aser poner.



Bola Tinubu-i Nigeria tir election kokogo



Abuja, Metsüremi/March 01 (Agencies): Nigeria tir election nung tang yimsü tesüdak party nungi Bola Tinubu-i takok nguogo ta sangdong.

Arishi küm 70 tain yimten yimsüsür tejen Tinubu-i vote shilem 37 angu.

Pa den tokteper Atiku Abubakar-i shilem 29 aser Labour Party nungi Peter Obi-i shilem 25 ngua liasü. Item telok yagi election meshidak agiogo ta aitsü aser tanaben agishitsü khanga liasü.

Tinubu ya Nigeria nung yimten yimsüsür takartiba lir aser pa governor inyakba mapang yimti tulutiba Lagos yanglushiba otsü nung ajemdaker nübu yima liasü.

Ajisüaka iba yimti nung pa dang Obi-i vote timba angu, shibai lanurtem dak tenük yoker nübu yima jaja aser linük nung two-party system melenshitsüsü nangzüka liasü.

Tinubu-i par home region south-west nung state timba ka nung takok ngua liasü, kong pa dang "political godfather" ta ajar.

Takok anguba osang sangdongba sülen Tinubu-i tatok agütsütepa jungshiteptsü ayongzüka liasü.

"Kü den külemi tokteper tem dang lungjemtsü ni ayongzüker. Asen asoshi linükji ya dang lir. Linük ka dang aser asenok lungjemer yangertsüla," ta pai ashi.

Iba election result ya court nung benoka jembitsü temeden lir saka election maparen nung timtem ajuruba kanga ajema lir aser itemji ajanga election result nung mokongshitsü, ta pai ashi.

Ketdangsur temi ashiba agi, vote agütsür shilem 27 liasü, koba 1999 küm mitkar yimsüsüba atemba sülen vote agütsür tajemtiba alitsü.

Tinubu asoshi vote million 8.8 shi agütsü, anungji vote agütsütsü temsüa alir Nigeria nunger million 93 rongnung shilem 10 dang tajembai pa shimba adoker, saka opposition lemsaba ajanga pa ajangzüker.

Election anogo matongdang nisung million 87-i voter card meshi saka polling station aika nung mapang shidak nung voting metenzükba ajanga aika meyipa ao.

Opposition tem tashi ita aliba tesem kar nungbo vote magütsü aser Rivers, Lagos aser Delta state tem nung ballot-box auyaba aser amokmerenba osang lir.

Pakistan SC-i province ana nung election agitsü tuyu

Islamabad, Metsüremi/March 1 (Agencies): Pakistan Supreme Court-i Punjab aser Khyber Pakhtunkhwa provincial assembly atema election anogo 90 tsüngda agitsü tetuyuba agütsüogo.

Chief Justice Umar Ata Bandial-i anir züngsem pongu agi kümtefta SC court bench kati Bodhbarnü iba telemtefta agia liasü. Okatsür anatiba iba tetuyuba agütsütsü memulungi liasü

"Parliamentary democracy ya constitution nung salient features rongnung ka lir. Parliament mesüra provincial assembly election melira parliamentary democracy mali..anungji iba ya temzüng ozüing anema lir," ta court tetuyuba nung shia lir.

Iba province ana nung assembly ya taoba Ato Kilonser Imran Khan-i aniba Pakistan Tehreek-e-Insaf (PTI) party-i amokbanger liasü. Election takaratiba nung agitsü atema nongshitsü asoshi Khan-i January ita province Angh dang assembly anaprongla loksatsü atema asüngdang liasü.

Pakistan nung yimya agi provincial aser national election külemi dang agir. General election ya taküm October ita agitsü lir.

Pakistan temzüng ozüing kübok provincial assembly loksaba sülen anogo 90 tsüngda

election agitsü tetuyuba agüja lir.

February 21 nü tir Arif Alvi, shiba PTI nungi lir, pai province ana nung election ya April 9 nü agitsü sangdonga liasü aser iba ajanga temzüng ozüing dak sendakba nung mepetmesü adok aser iba tetuyuba agütsütsü ya pa dak tashi ali mali ta mongintemi shisadanga liasü.

Election agitsüba anogo telemtefta agitsü atema temzüng ozüing kübok sorkar institution koba nem tashi agüja lir ibaji jangjatsü atema tir-i tetuyuba agütsüba ken o ya SC-i agizüka liasü.

SC-i ashiba agi, Punjab Angh Muhammad Baligh Ur Rehman-i, assembly loksatsü atema sangdongba nung sign masü anungji province nung election agitsüba anogo sangdongtsü atema tir dak tashi lir.

SC-isa, Khyber Pakhtunkhwa Angh Haji Ghulam Ali-i, January 18 nü assembly loksaba sangdong nung sign süaka pai election agitsüba anogo mesangdong, koba temzüng ozüing kübok pa nem nongloktsüba maparen shidak minyakba lir, ta ashi.

Okadak ajanga osang agütsüba dak sendakba nung Election Commission of Pakistan (ECP)-i tang tashi nung kecha telangzüba agüja mali.

Kasa mapang nung PTI mendenbuba Khan-i court-i obendang agütsüba pelashishia

agizükogo. Paisa, election tangsa tang agitsü atema akhangtsü asoshi "fill the jails" longkak aitba sentong sota atar aser province ana nung nüboyimba sentong ayongzüka agitsü atema renemshi tenzüksü, ta ashi.

"Temzüng ozüing shidak benoka inyaktsüji Supreme Court khuret lir aser tanü iba obendang agüja parnoki jenjang shidak agiogo," ta pai Twitter nung zülutsü.

Legal expert Reza Ali-i ashiba agi, anogo 90 tsüngda election agitsü atema Pakistan temzüng ozüing nung jangja jangja shia lir. "Iba ken o ya Supreme Court dangi abentsüa kecha nungdak mali," ta Lahore nung amendaker aliba obendager yagi AlJazeera dang ashi.

Ajisüaka Ali-i ashiba agi, court-i election agitsüba anogo ka jangja jangja shia mali.

Maneni obendanger Salman Niazi-i ashiba agi, Punjab Angh-i election agitsüba anogo mesangdongi nungdak makaba nung mepetmesü adokdaksüogo.

Lahore nung amendaker aliba think-tank, Pakistan Institute of Legislative Development and Transparency (PILDAT) nungi Aasiya Riaz-i, SC-i tetuyuba agütsüba ajanga election agitsü atema ken o tebenjaba kümdaktsüogo.

Mumbai Indians captain asütsü Kaur shimogo



New Delhi, Metsüremi/ March 1 (Agencies): Mezüngbuba Women's Premier League (WPL) atema Mumbai Indians tetsür team captain mapa abentsü atema Harmanpreet Kaur shimogo.

Iba asayamung nung Mumbai Indians pur mezüngbuba asaya March 4 nü DY Patil Stadium, Mumbai nung Gujarat Giants den asayatsü.

Harmanpreet, shiba tawa cricket asayartem rongnungi

T20I asaya 150 asayaba mezüngbuba asayar aküm, la ya arishi küm 20 asüdang national team nung mezüngbuba asayaba sülen format ajak nung kanga tongtumbang asayar ka kümogo.

National team captain, shiba MI puri WPL auction nung sen crore 1.8 agi alizüka liasü, la ya Women's World Cup nung run (171*) timtiba yangluba asayar lir.

Maneni Harmanpreet-i India nung cricket asayaba yimya

alima ajunga dang kanga junga sayudar aser la ya India nung rongnungi bendanglen oa T20 league balala nung asayaba mezüngbuba asayar lir.

Harmanpreet-i head coach Charlotte Edwards aser bowling coach aser mentor Jhulan Goswami naprongla den asayaogo.

"Mumbai Indians' indang mezüngbuba tetsür cricket team captain asütsü Harmanpreet shiba atema onok kanga pelar. National captain ama lai India tetsür team takok ngua ania arudar aser Charlotte aser Jhulan na teyari nung lai MI women's team kanga junga asayatsü asoshi ajungmesotsü aser takok tajung bener arutsütsü imlar," ta franchise kibur Nita Ambani-i ashi.

Mumbai Indians team:

Harmanpreet Kaur, Nat Sciver-Brunt, Amelia Kerr, Pooja Vastrakar, Yastika Bhatia, Heather Graham, Isabelle Wong, Amanjot Kaur, Dhara Gujar, Saika Ishaque, Hayley Matthews, Chloe Tryon, Humairaa Kaazi, Priyanka Bala, Sonam Yadav, Neelam Bisht, and Jintimani Kalita.

Ashwin World No.1 Test bowler kümogo



New Delhi, Metsüremi/ March 1 (Agencies): India off-spinner Ravichandran Ashwin Bodhbarnü jenjang ana tejakdangi tua bowler tem atema ICC Test rankings nung temaba jenjangi tuogo.

Ashwin-i England nung asayar tejen James Anderson atsüngtoka Test asaya nung World No.1 bowler kümogo. Australia den tanabuba Test asayaba mapang wicket trok agiba sülen pa jenjang ana tejakdangi tua liasü.

Wellington Test nung run ka agi New Zealand makokba sülen Anderson tanabuba jenjangi asepsüka aluogo.

Arishi küm 36 tain Ashwin, 2015 küm mezüngbuba Test bowler tem rongnung temaba jenjangi atu aser iba sülen aiben temaba jenjang tongteta asayaogo.

Delhi nung asayaba mapang Ashin-i asayar tajungtem aika out süja liasü. Pai mezüngbuba innings nung Marnus Labuschagne aser Steve Smith na over ka nung out sütsü aser iba sülen Alex Carey nem run ka danga mey angludaktsü out süja liasü.

Tanabuba innings nunga pai top five nungi asaya asem out sütsü aser tanungba asayartem ya Ravindra Jadeja-i out süja liasü.

Tanga asaya aliba Border-Gavaskar Trophy nung

tanungba asaya ana nung junga asayara Ashwin-i temaba jenjang nung pa jenjang yanglushitetsü.

Anderson-i Australia captain Pat Cummins ajateta temaba jenjangi atuba sülen tang Ashwin-i pa ajatetogo aser parnok asem ya top three lir. Anderson-i rating point (864) pongu agi Ashwin memenepi lir.

Tanabuba test nung wicket 10 agiba sülen Jadeja-a bowling rankings nung jenjang tibuba tongogo.

Test All-Rounder Rankings nung Jadeja aser Ashwin na temaba jenjang ana nung lir.

All-rounder rankings nung England nung asayar Joe Root-a jenjang ana tejakdangi tua tang tibuba tongtetogo.

Wellington nung kanga junga asayaba sülen ICC Test Batting Rankings nung Root-i, Travis Head aser Babar Azam na ajateta tasembubai tuogo. Test batter tem rongnung Labuschagne aser Steve Smith na maneni temaba jenjang ana nung lir.

New Zealand nung asayar Tom Blundell-a top 10-i iogo. Pa jenjang pezü tejakdangi tua tang tenetbuba nung lir.

Batting rankings nung England nung asayar Harry Brook maneni tejakdangi tudar aser pa jenjang 15 tejakdangi tua 16buba nung Virat Kohli den kasa kümogo.

Taoba mapang France nung nungtuogo asayar Fontaine süogo

New Delhi, Tsüklai/February 1 (Agencies): Taoba mapang France nung nungtuogo football asayar Just Fontaine arishi küm 89buba nung süogo, ta par kinungertemi Bodhbarnü sangdong ka ajanga metetdaksü.

Fontaine ya World Cup ka nung goal timtiba idaktsüba asayar liasü. Pai World Cup ka nung goal 13 idaktsü.

Fontaine-i iba otsü tasen ya 1958 küm Sweden nung asayaba mapang yanglu, kong

France team puri puti otsü nung mezüngbuba semifinal tonga asaya liasü.

1953 nungi 1960 küm tashi France tenung nungi 21ben asayaba mapang Fontaine-i goal 30 idakja liasü.

1958 küm Sweden nung France team semifinal tonga asayaba mapang pai kanga tongtumbang shilem agia liasü.

Maneni striker tajung ka ama club balala nungi asayaba mapang asaya 283 nung pai goal 259 idaktsüogo aser 1959

küm European Cup final tonga asayaba Stade de Reims-i aniba team nung pa tongtumbang asayar ka liasü.

Reims, shibai Fontaine den külemi French top flight titles asem tashi koka liasü, pai aniba team ya final nung Real Madrid-i goal 2-0 agi akok, ajisüaka 'Justo' ya iba asayamung nung goal (10) timtiba idaktsüba asayar liasü.

Coach ka ama Fontaine-i teyari agüja PSG pur 1974 küm first division-i ajungketa liasü.

Nadal Indian Wells Masters nung masayatsü

Metsüremi/March 1, 2023 (Agencies): Grand Slam 22ben tashi koker aliba asayar Rafael Nadal yiruba ajanga Indian Wells nung ATP 1000 asayamung nung shilem magitsü telemtetba agiogo, ta asayamung ayongertemi metetdaksü. Pai iba asayamung ya asemen koker lir.

Spain nung asayar yagi January ita tatemlen pa Australian Open mapa yiruba anepalutsü atema hopta trok nungi ti tashi agitsü ta ashiba sülen iba osang sangdonga liasü.

"Rafa yakta taneptsü ngua taruba küm BNP Paribas Open nung asayatsü imla atar," ta tournament director Tommy Haas-i ashi.

January 26 nü Nadal-i, hip tabelen len tetsü tera shisar lir saka surgery agitsü nungdak

mali ta ashi.

Miami nung ATP 1000 asayamung nunga Nadal asayatetsü masayatetsü mejangja, koba Indian Wells tembangba sülen Los Angeles nung March 8 nü nungi asaya tenzüksü.

Ajisüaka pa May ita Roland Garros masaya tsüngda April ita tom nungi tenzüksü aliba clay-court season atema renemer alitsü imlar. Pai French Open ya 14benbo kokogo.

Nadal, shibai 2022 küm Australian Open nung Grand Slam 21buba koka otsü tasen ka yanglu, ajisüaka taküm January ita iba asayamung nungbo pa asaya ana dang asayar tsükatok.

Paia ashiba agi, Melbourne nung asayaba mapang pa anogo ana asemka timtema liasü saka iba mapang nung temang

metendangi liasü.

Nadal, shiba yiruba ajanga mapangshia timtema arudar, pai pa maneni asayaner, ta shiogo.

"Tang nungibo telemtetba shidak agitsü, kechiyong ni maneni asayaner," ta pai ashi.

Taoba küm Nadal khen danga tamakok mongui aliba mapang Indian Wells asaya. Australian Open masaya tsüngda pai Melbourne nung asayamung ka akok aser Australian Open final nunga pai Daniil Medvedev koka liasü.

Pai Acapulco nung ATP asayamung ka akok aser Indian Wells final tonga asaya ajisüaka final nung pa America nung Taylor Fritz-i tsükdaksü.

Iba sülen Roland Garros nung pai Grand Slam 22buba koka otsü tasen ka yanglu, ajisüaka iba otsü tasen ya Djokovic-ia menepogo.

NIA Court-i kiralongrar... (Tapak 3 nungi...)

Kasa ken o nung aibelener, Mohammad Saifullah bo tepsetogo. Saifullah-i Lucknow kübok Haji Colony area nung tejenokdak ka bushia yangji improvised explosive devices (IEDs) bomb kar tendanga liasü. Parnoki IED bomb ji Uttar Pradesh tesem balala nung rema yutsür lendong agütsütsü sentong liasü.

Bushisüngdanga mapang nung IED yangluba mapang tangokba noksa aika apuba den külemi prangpong aser injang den ISIS wako angu.

"Iba telok jagi tesem balala nungi ozüng alema prangpong aser bomb bendena liasü. 2017 küm March 7 nü Atif den

tangar asem - Danish, Hussain aser Saifulla nungeri Bhopal-Ujjain passenger train nung IED bomb pokdaksüba lendong nung nisung 10 yirua liasü," ta NIA otongdarisa metetdaksü.

India nung ISIS tangatetba proktsü aser kiralongratsü atema parnok longjema liasü, ta NIA-i metetdaksü.

"Parnok nükjidong ataloktsü atema Faisal, Khan, Muzaffar, Danish aser Saifulla nungeri Kolkata, Sundarbans, Srinagar, Amritsar, Wagha Border, Badmer, Jaisalmer, Mumbai aser Kozhikode densema linük nung yimti aika semdanga liasü," ta NIA-i metetdaksü.

BILEMDANGANG

"Tanü ajung dang bilema inyaksangshirtemi tarutsü raksatsür."